

Úttekt Matvælastofnunar 15.04.2025 – frávik og andmæli

1.Frávik – 4.2.1 Yfirlit yfir fiskeldisstöð á landi. Ekki er til staðar yfirlitsmynd yfir fiskeldisstöðina, eldiseiningar, stærð eldiseininga, frárennsli og varnir gegn stroki í frárennsli. (12. og 19.gr. reglugerðar 540/2020 og skilyrði rekstrarleyfis).

Vísað í reglugerð 540/2020:

Í 12.gr reglugerðarinnar kemur fram eftirfarandi:

Í umsókn skulu m.a. koma fram eftirfarandi upplýsingar og viðeigandi gögn:

7. Upplýsingar um heildarstærð stöðvar í rúmmetrum, staðsetningu og afstöðumynd af væntanlegri starfsemi þar sem fram kemur lega og stærð einstakra eldiseininga.

Í 19.gr reglugerðarinnar kemur fram eftirfarandi:

Í rekstrarleyfi fiskeldisstöðva á landi skal kveða á um að gildistaka þess sé háð því skilyrði að stöð sé útbúin búnaði sem kemur í veg fyrir að fiskur sleppi úr eldiskari og búnaði staðsettum í frárennsli stöðvar sem fangar fisk sem sleppur.

Andmæli First Water:

Á stöðinni eru yfirlitsmyndir af fiskeldisstöðinni þar sem fram kemur lega og stærð einstakra eldiseininga (sbr. 12.grein í reglugerðinni). Eins yfirlitsmynd er stór og ýtarleg og liggur á öllu fundarborðinu þar sem úttektin átti sér stað og var farið yfir myndina með úttektaraðilum Matvælastofnunar. Einnig hangir önnur yfirlitsmynd í starfsmannarými á milli skrifstofu og kaffistofu.

Stöðin er útbúin búnaði sem kemur í veg fyrir að fiskur sleppi úr eldiskari og búnaði staðsettum í frárennsli stöðvar sem fangar fisk sem sleppur (sbr. 19.grein í reglugerðinni), eins og kveðið er á um í rekstrarleyfi félagsins í samræmi við efni rekstrarleyfis skv. 19. gr. reglugerðarinnar.

Í reglugerðinni (540/2020) stendur ” Í umsókn skulu m.a. koma fram eftirfarandi upplýsingar og viðeigandi gögn”, þessi gögn fylgdu umsókn rekstrarleyfis. Með öðrum orðum fjallar ákvæðið um hvað skuli koma fram í umsókn um rekstrarleyfi og er ekki kveðið á um að þartilgerð yfirlitsmynd skuli hanga uppi á vegg á stöðinni. Einnig er hvergi minnst á í reglugerðinni að yfirlitsmynd þurfi að vera til staðar á stöðinni af frárennsli og vörnum gegn stroki í frárennsli. Ef Matvælastofnun óskar eftir slíku þarf það að vera tilgreint í reglugerð, en tekið skal fram að félagið hafi þrátt fyrir framangreint stillt upp yfirlitsmyndum í fiskeldisstöðinni til upplýsinga fyrir starfsfólk, eftirlitsmenn og aðra eins og við á.

2. Frávik – 4.3.1 Strok. Uppfæra þarf viðbragðsáætlun um stork. Ekki þarf að vera til staðar staðfest stork af starfsmanni heldur þarf aðeins að vera grunur um stork. Breyta þarf netfangi

varðandi stök í fiskeldi@mast.is . Skv. 45.gr. reglugerðar um fiskeldi nr. 540/2020 skal rekstrarleyfishafi tilkynna stök til Fiskistofu, Matvælastofnunar, sveitarfélaga og næstu veiðifélaga. Í verklagsreglu eftirlitsþega vantar að það komi fram að tilkynna beri til næstu veiðifélaga og hver þau eru. (45.gr. og viðauki IV. Í reglugerð nr.540/2020)

Vísad í reglugerð 540/2020:

Í 45.gr reglugerðarinnar kemur fram eftirfarandi:

Rekstrarleyfishafi, sem hefur ástæðu til að ætla að hann hafi misst eldisfisk úr fiskeldisstöð, skal án tafar tilkynna slíkan atburð til Fiskistofu, Matvælastofnunar, sveitarfélaga og næstu veiðifélaga.

Andmæli First Water:

Eftirfarandi netfang (fiskeldi@mast.is) er hvergi tilgreint í reglugerðinni, eingöngu stendur að tilkynna skal slíkan atburð til Matvælastofnunnar. Það er enginn möguleiki fyrir úttektaþega að vita að netfangið hafi breyst ef það er hvorki tilgreint í reglugerðinni, og Matvælastofnun hefur ekki sent út tilkynningu um slíka breytingu. Félagið mun að sjálfsögðu hlíta ákvæðum reglugerðarinnar um tilkynningu til Fiskistofu, Matvælastofnunar, sveitarfélaga og næstu veiðifélaga með fullnægjandi tilkynningu þar um.

3. Frávik – 4.3.2 Við skoðun á netum kom í ljós að til staðar voru net með einni möskvastærð sem er of stórar miðað við minnsta fisk sem var á stöðinni við eftirlit og mögulega of lítil fyrir stærsta fisk í stöðinni.

Athugasemd First Water:

Tekið er undir ábendingu um að net hafi vantað með hæfilegri möskvastærð fyrir minnsta fisk í stöðinni. Ný net með möskvastærð 2,5” hafa þegar verið keypt frá Ísfell fyrir minnsta fiskinn í stöðinni (í 15m kerjunum) og er það nú þegar komið á stöðina.

Því er aftur á móti mótmælt að ”mögulega séu netin of lítil fyrir stærsta fisk í stöðinni”.

Á tíma úttekta er fiskur einungis alinn upp í 3-3,5 kg og ekki stendur til að ala stærri fiska fyrr en næsta kerjastæða (25m ker) verður tekin í gagnið

Réttilega þarf að endurskoða stærð netanna þegar 25m kerin eru tekin í notkun, en þá verður fiskurinn alinn upp í 4-5 kg. Eins og staðan er í dag þá er netið sem var á stöðinni í úttektinni rétt stærð fyrir stærsta fiskinn á stöðinni í dag.

4. Alvarlegt frávik – 5.1.5 Gæðastjórnun og innra eftirlit. Eftirlitsþegi sýndi ekki fram á að verklag væri til staðar fyrir innra eftirlit. Vísad eftirlitsþegi til framkvæmdar á sannprófun því til staðfestingar. Matvælastofnun telur það ekki fullnægjandi, rekstrarleyfishafi þarf að hafa til staðar verklag hvað varðar innra eftirlit, sbr. 47., 48. Gr og viðkaup III reglugerðar

um fiskeldi nr. 540/2020, og sinna innra eftirliti með reglubundnum hætti með þeim þáttum sem tilgreindir eru í framangreindum reglugerðarákvæðum.

Vísað í 48.gr. reglugerðar 540/2020:

Innra eftirlit allra sjókvíaeldisstöðva og seiðaeldisstöðva fyrir sjókvíaeldi sem og landeldisstöðva þar sem hámarkslífmassi er yfir 20 tonnum skal felast m.a. í því að:

- a. Starfrækja gæðakerfi sem hluta af innra eftirliti þar sem koma fram verklagsreglur stöðvar þar sem m.a. er fjallað um þjálfun starfsmanna, viðhalds- og viðbragðsáætlanir, sbr. viðauka III.
- b. Koma á virku eftirliti þar sem fram kemur hvað á að vakta, hver á að annast vöktun, hvenær og hvernig vöktun fer fram.
- c. Skilgreina viðmiðanir fyrir þau eftirlitsatriði sem eru vöktuð.
- d. Skilgreina hver er ábyrgur fyrir framkvæmd úrbóta og lýsa aðferðum og aðgerðum sem nauðsynlegar teljast til að leiðrétta frávik.
- e. Skrá allt eftirlit, úrbætur og viðhald sem tengist innra eftirliti eldisstöðvar og geyma í minnst fimm ár. Allar skráningar skulu dagsettar og undirritaðar.
- f. Rekstrarleyfishafi skal sannreyna að verklagsreglur og viðbragðsáætlanir uppfylli markmið og gera nauðsynlegar úrbætur.

Vísað í viðauka III í reglugerð 540/2020:

Innra eftirlit.

Við skrif á verklagi innra eftirlits skulu koma fram markmið, ábyrgð, framkvæmd og tíðni eftirlits, viðmiðanir, úrbætur og skráning. Í gæðahandbók skal að lágmarki vera eftirfarandi innra eftirlit:

- a. Móttökueftirlit (ástand netpoka við móttöku).
- b. Yfirborðseftirlit (s.s. ástand á búnaði, fiski á yfirborði og afræningjum við eldiskvíar).
- c. Neðansjávareftirlit (köfun eða eftirlit með neðansjávarmyndavélum).
- d. Eftirlit með laxalús.
- e. Eftirlit með skyggni sjávar (sjóndýpi), sjávarhita og súrefnisinnihaldi sjávar.
- f. Vöktun á botnseti/botndýrum.

Andmæli First Water:

Pegar spurt var um innra eftirlit úttektaþega voru úttektaðilar Matvælastofnunar beðnir um að útskýra betur hvað þeir vildu sjá tengt innra eftirliti og hvort það væru innri úttektir sem þeir vildu sjá. Úttektaðilar Matvælastofnunar gáfu að okkar mati óskýr svör og sögðust hafa gleymt reglugerðinni úti í bíl. Úttektaðilar Matvælastofnunar réttu úttektaþegum útprentað A4 blað frá

ChatGPT til útskýringa. Af þeim sökum var það óljóst af hálfu úttektarþega hvað væri verið að biðja um og þeim gafst því ekki tækifæri til að sýna fram á að fyrirtækið er með virkt innra eftirlit. Fyrirtækið heldur úti gæðakerfi sem er hluti af innra eftirliti þar sem koma fram verklagsreglur stöðvarinnar (sbr. reglugerð) og var farið yfir mikið af þessum verklagsreglum í úttektinni. Til staðar er verkferillinn „Routine tasks“ sem tilgreinir öll þau vöktunatriði sem eldisstarfsfólk fyrirtækisins sinnir daglega, s.s. að meta matarlýst, að fylgst með hvort hegðun fisksins sé óhefðbundin, að fylgst með hvort sveimarar séu í karinu og þá fjarlægja þá ásamt því að fjarlægja dauðfisk. Sömuleiðis vaktar gæðafulltrúi vatnsgæði í öllum kerjum og inntaki vatns (borholum) daglega með framkvæmd vatnsmælinga (s.s. vöktun á hitastigi, seltu, turbidity, pH, súrefni, Co2, TAN, TGP) og eru til verkferlar um það á stöðinni. Neðansjávarmyndavélar eru komnar í nokkur ker og er það í ferli að fá myndavélar í öll ker til að fylgjast betur með hegðun fisksins, velferð og matarlýst ofan í kerjunum. Viðmiðanir fyrir þau eftirlitsatriði sem eru vöktuð eru skilgreindar réttilega í öllum okkar verkferlum. Viðbragðsáætlanir eru einnig til staðar ef mörk fara yfir sett viðmið og voru nokkrar þeirra skoðaðar í úttektinni (s.s. viðbragðsáætlunin „critical water quality issues – emergency plan“). Ábyrgðaraðili er skráður á hvert skjal í gæðahandbók fyrirtækisins. Dagleg verk eldisstarfsfólks eru skráð í DMM viðhaldskerfi fyrirtækisins, þar sem starfsmaður hakar í kláruð verk og kvittar fyrir. Stöðvarstjóri yfirfer skráningar í DMM daglega. Vöktun á vatnsgæðum er skráð inn í Mercatus og eru þær dagsettar. Gæðafulltrúi yfirfer skráningar í Mercatus vikulega og var það útskýrt og sýnt úttektaraðilum að hún fær áminningu um það vikulega. Verklagsreglur innra eftirlits eru sannreyndar með innri úttektum (innri úttektir eru á öllum verkferlum fyrirtækisins einu sinni á ári eins og var útskýrt og sýnt úttektaraðilum). Félagið telur því samkvæmt framangreindu að innra eftirlit sé í fullu samræmi við ákvæði 47. og 48. gr. reglugerðarinnar og viðauka III.

5. Frávik – 5.1.1 Gæðahandbók sjókvíaeldisstöðva. Eftirlitsmenn óskuðu eftir staðfestingu á að árlegur fundur hafi farið fram með öllum starfsmönnum fiskeldisstöðvarinnar þar sem farið er yfir alla kafla gæðahandbókar þar sem breytingar eru kynntar auk nýrra áherslna sem gerðar hafa verið. Eftirlitsmönnum var sýnd glærukynning sem farið var yfir með starfsmönnum en skv. eftirlitsþega var fundurinn haldinn 4.apríl 2025.

Af gögnum sem eftirlitsmönnum var sýnt er ljóst að árlegi fundurinn fjallar ekki um þau atriði sem fjalla ber um skv. Viðauka III í reglugerð um fiskeldi nr. 540/2020. Þá er dagsetning fundar hvergi tilgreind né liggur fyrir staðfesting starfsmanna fyrir þáttöku á fundinum, einungis listi með 12 fornöfnum. Fyrir liggur að einungis hluti starfsmanna eftirlitsþega voru viðstaddir fundinn og haldinn verður fundur fyrir þá síðar.

Viðauki III í reglugerð 540/2020:

Árlega er haldinn fundur með starfsmönnum þar sem farið er yfir efni gæðahandbókar og kynntar breytingar og nýjar áherslur sem gerðar hafa verið. Þátttaka starfsmanna er skráð í þjálfunarskrá.

Andmæli First Water:

Enginn ýtarlegur rammi er í reglugerðinni um umfang og innihald þessarar kynningar. Á fundinum sem haldinn var með starfsfólki 4. apríl 2025 var farið yfir efni gæðahandbókar (sbr. Viðauki III). Ekki voru kynntar breytingar eða nýjar áherslur, enda höfðu þær ekki farið fram, og á fundinum var gæðahandbókin einfaldlega kynnt fyrir starfsfólki, eins og viðeigandi reglugerðarákvæði kveður á um. Fundurinn verður svo aftur haldinn að ári og þá verður farið yfir breytingar frá síðasta fundi, hafi einhverjar verið gerðar, og/eða nýjar áherslur. Þáttaka starfsmanna á fundinum þann 4. apríl 2025 var skráð í þjálfunarskrá (sbr. nafnalistinn sem fræðslustjórinn okkar sýndi í úttektinni) þar sem einnig var tilgreind dagsetning á fundinum. Ekki segir til um í reglugerðinni að frekari staðfesting frá starfsfólki þurfi að vera til staðar. Ef Matvælastofnun óskar eftir undirskrift starfsmanna eða ýtarlegri fundargerð þarf þess að vera getið í reglugerð til að félaginu sé unnt að fylgja slíkum fyrirmælum. Kynningin á gæðahandbókinni var haldin viku fyrir úttektina og ekki náðist að halda aðra kynningu fyrir úttektina með því starfsfólki sem missti af fyrri kynningunni. En er það á áætlun gæðastjóra í maí og í samræmi við kröfur reglugerðarinnar um að halda skuli árlega fund með starfsmönnum.

Kafli 5.1.1 í eftirlitsskýrslu Mast heitir „Gæðahandbók sjókvíaeldisstöðva“. First Water vill benda á fyrirtækið er ekki sjókvíaeldisstöð.

6. Frávik – 5.1.2 Þjálfun starfsfólks. Ekki er sýnt fram á að starfsfólk fái þjálfun í að hindra strok og að lágmarka umhverfisáhrif.

Þjálfunarskrá starfsfólks er ófullnægjandi. Upplýsingar um þjálfun virðist skráð á a.m.k. tvo staði og því erfitt að fá heildsvæða mynd á þjálfun starfsmanna. Ekki er hægt að sjá á þeim þjálfunarskrám sem til eru hvænær starfsmaður hóf störf og hvenær viðkomandi tók þau námskeið sem tilgreind eru sem lokin í þjálfunarskránni. Það er því ekki hægt að sannreyna með því að lesa úr þjálfunarskrá hvort starfsmenn fá þá þjálfun sem þeim ber að fá og að það sé gert innan tilsettra tímamarka.

Að mati Matvælastofnunnar eru þjálfunarskrár starfsfólks því ófullnægjandi og þarfnast úrbóta.

Vísad í reglugerð 540/2020:

Í 50.gr. reglugerðarinnar:

Rekstrarleyfishafi skal tryggja að áður en starfsmenn hefja störf í fiskeldisstöð fái þeir þjálfun í að hindra strok og öðlist þekkingu og færni til að grípa strax til viðeigandi ráðstafana ef strok eiga sér stað og hvaða reglur gilda um veiðar á eldisfiski sem sleppur úr eldisstöð og hvernig framkvæma skal veiðar á þeim.

Jafnframt skal nýjum starfsmönnum kynnt gæðakerfi eldisstöðvar og þær verklagsreglur sem farið er eftir við stjórnun í eldisstöðinni.

Í viðauka III reglugerðarinnar:

Þjálfun starfsmanna.

Tryggja skal að starfsmenn fái þjálfun þar sem markmið er:

- a. Að hindra strok og virkja viðbragðsáætlun ef það gerist.
- b. Að lágmarka umhverfisáhrif.
- c. Að tryggja velferð eldisdýra.

Halda skal þjálfunarskrá fyrir hvern einstakan starfsmann. Þjálfunarskrá inniheldur þá þjálfun sem starfsmaður hefur lokið og í henni eru tilgreindir þeir verkþættir sem starfsmaður þarf að tileinka sér. Öllum starfsmönnum skal kynnt gæðastjórnunarkerfi fyrirtækisins í nýliðakynningu. Með nýliðaþjálfun skal tryggt að starfsmaður hafi enn fremur lokið eftirfarandi þjálfun:

- a. Varnir gegn stroki; helstu ástæður fyrir stroki og hvernig best er að koma í veg fyrir þær.
- b. Viðbrögð við stroki.
- c. Meðhöndlun eiturefna þegar það á við.
- d. Þekkingu á verklagsreglum, viðbragðsáætlunum og innra eftirliti sem hann vinnur við.

Árlega er haldinn fundur með starfsmönnum þar sem farið er yfir efni gæðahandbókar og kynntar breytingar og nýjar áherslur sem gerðar hafa verið. Þátttaka starfsmanna er skráð í þjálfunarskrá.

Fræðslustjóri fyrirtækisins sýndi úttektaaðilum Matvælastofnunar þjálfunarskrá fyrirtækisins. Hún er staðsett á tveimur stöðum í dag en ekkert stendur um það í reglugerðinni að hún eigi að vera á einum stað og gætir fræðslustjóri að því að fullt samræmi sé milli þjálfunarskráa. Fyrirtækið heldur utan um alla eigin þjálfun í LearnCove fræðslukerfi fyrirtækisins og svo er aukaleg þjálfun, s.s. ítarlegri námskeið eins og innri úttektir og sannprófun, HACCP eða lyftarapróf í yfirlitsskjali sem fræðslustjóri fyrirtækisins heldur utan um. Allir starfsmenn í eldinu fóru í gegnum viðamikla rafræna þjálfun í febrúar og mars 2025 til að kanna þekkingu starfsmanna á helstu verkþáttum sem starfsfólk þarf að tileinka sér en fræðslan var í formi videoa og glæra og endaði á könnun og var frammistaða allra starfsmanna skráð í fræðslukerfið okkar, LearnCove og þar er hægt að sjá nafn starfsmanns, dagsetningu á því hvenær starfsmaður lauk fræðslunni og hvaða einkunn starfsmaður fékk en fræðslukerfið var stillt þannig að starfsmaður gat ekki haldið áfram nema fá ákveðna lágmarkseinkunn. Af þessu má sjá að félagið hefur gert ítarlegri kröfur til starfsmanna sinna varðandi þjálfun en viðauki III við reglugerðina segir til um, enda fá starfsmenn bæði nýliðaþjálfun samkvæmt viðauka III og reglubundna endurmenntun sem tryggir þjálfun starfsmanna, þar sem markmiðið er að þjálfar starfsmenn í að hindra strok og virkja viðbragðsáætlun ef það gerist, að lágmarka umhverfisáhrif, og að tryggja velferð eldisdýra.

Fyrirtækið heldur utan um hvenær starfsmaður hóf störf inni í mannauðskerfi fyrirtækisins og það er mjög auðvelt að fletta því upp. Ekkert stendur um það í reglugerðinni að dagsetning á því hvenær starfsmaður hóf störf þurfi að vera á þjálfunarskrá starfsmannsins og þess vegna hefur sú dagsetning eingöngu verið vistuð í mannauðskerfi fyrirtækisins (annað kerfi sem fræðslustjóri vinnur mikið með). Fræðslustjóri fyrirtækisins sýndi úttektaaðlinum námskeið sem starfsmaður tók í LearnCove

og þar kom nákvæmlega fram hvenær námskeðið var tekið og því er þetta ekki rétt sem sagt er í skýrslunni að mati félagsins. Ekkert er nefnt um tilsetta tímaramma þjálfunar í reglugerðinni.

7. Frávik - Verklagsreglur. 5.1.3 Verklagsreglur vegna flokkun seiða og flutning á fisk í og úr stöð eru ófullnægjandi. Í hvorugri verklagsreglunni eru tilgreind viðbrögð ef frávik koma upp s.s. barki rofni eða stíflast. Í verklagsreglu um flutning á fisk kemur fram að „nógu margir“ starfsmenn þurfi að vera til staðar þegar flutningur á sér stað. Matvælastofnun bendir á að betra sé að skilgreina betur hversu margir starfsmenn þurfi að vera við framkvæmdina.

Matvælastofnun bendir á að nauðsynlegt er að hafa verklagsreglur vegna þéttleika í kerjum og skrifuð viðmið um hvenær þurfi að grisja/flytja fisk á milli kerja o.s.frv.

Matvælastofnun beinir þeim tilmælum til eftirlitsþega að hafa verklagsreglur á íslensku.

Andmæli First Water:

Ekkert bendir til þess í reglugerðinni að verklagsreglur þurfi að vera á íslensku. Gæðahandbók úttektarþega er sett upp á ensku svo að allt starfsfólk fyrirtækisins skilji innihald hennar, í stað þess að hafa verklagsreglurnar eingöngu á íslensku, enda er starfsfólk félagsins af mismunandi þjóðerni. Það er hins vegar sjálfsagt að hafa tvítyngdar verklagsreglur en tekið skal fram að ekki er gerð krafa um slíkt samkvæmt reglugerðinni. Það er einnig á áætlun að innleiða ASC vottun þar sem erlendir vottunaraðilar munu koma að úttektum og gagnast erlendum vottunaraðilum eðli málsins samkvæmt betur að nálgast verklagsreglur á ensku.

Í verklagsreglu „Receiving fish“ stendur eftirfarandi í kaflanum „Personnel“:

Personnel

There must be enough employees present during the reception of fish and work tasks must be delegated to the employees before the work operation starts.

1. The work operation requires a minimum of three people, two employees must stand by and in the tank to ensure that the fish exits the hose and watch the oxygen values in the car, while the other employee must watch the hose that goes out of the car and into the fish tank.

Úttektaraðilar Matvælastofnunar virðast ekki hafa tekið eftir því að línunni fyrir neðan er nákvæmlega tilgreindur fjöldi starfsmanna.

8. Frávik – 5.1.4 Viðbragðsáætlanir. Uppfæra þarf viðbragðsáætlun um tímabundna og varanlega rekstrarstöðvun þannig að tilkynna þurfi til Matvælastofnunannar þegar rekstrarstöðvun hefur átt sér stað.

Í viðbragðsáætlun um massadauða vegna sjúkdóma og umhverfisástands vantar að tilgreina ábyrgðaraðila og uppfæra skv. núverandi stöðu.

Matvælastofnun bendir á að setja þurfi upp víðtækari viðbragðsáætlanir vegna vá sem gæti stöðjað að þessari stöð, m.a. hvað varðar bilun í búnaði, eldsvoða o.fl.

Matvælastofnun beinir þeim tilmælum til eftirlitsþega að hafa viðbragðsáætlanir á íslensku.

Andmæli First Water:

Eins og áður segir bendir ekkert til þess í reglugerðinni að viðbragðsáætlanir þurfi að vera á íslensku. Gæðahandbók úttektarþega er sett upp á ensku svo að allt starfsfólk fyrirtækisins skilji innihald hennar. Það er einnig á áætlun að innleiða ASC vottun þar sem erlendir vottunaraðilar munu koma að úttektum.

9. Frávik – 5.1.6 Innri úttektir – sannprófun

Eftirlitsþegi sýndi ekki fram á verklag væri til staðar fyrir sannprófun og ljóst að sannprófun nær ekki til allra þátta sem henni er ætlað að ná til þar sem innra eftirlit er ekki virkt.

Vísad í reglugerð 540/2020:

Í viðauka III:

Sannprófun.

Tíðni: Sannprófa skal innra eftirlit eldisstöðvar að lágmarki einu sinni á ári, alltaf eftir strok eða önnur alvarleg óhöpp og þegar breytingar eiga sér stað á rekstri eldisstöðvarinnar.

Framkvæmdaraðilar: Skipa skal sannprófunarhóp og sá aðili sem framkvæmir sannprófunina skal vera óháður þeim þáttum sem verið er að sannprófa hverju sinni.

Framkvæmd: Rekstrarleyfishafi skal útbúa gátlista sem inniheldur öll þau atriði sem þarf að sannprófa. Gátlisti skal að lágmarki innihalda alla kafla gæðahandbókar þar sem merkt er við hvort viðkomandi atriði eru í lagi eða ekki.

Við sannprófun skal fara yfir allar skráningar á innra eftirliti eldisstöðvarinnar í heild sinni og hafa til viðmiðunar eftirtalin atriði:

- a. Hvort fyrirbyggjandi ráðstöfunum hafi verið framfylgt varðandi:
 - I. viðhald á eldisstöðinni,
 - II. þjálfun starfsmanna,
 - III. verklagsreglur.
- b. Hvort viðbragðsætlunum hafi verið framfylgt.
- c. Hvort eftirlit og úrbætur hafi verið í samræmi við innra eftirlit eldisstöðvar.
- d. Hvort ástæða sé til að breyta þeim viðmiðunum sem notaðar eru.
- e. Hvort fullnægjandi úrbætur hafi verið gerðar á athugasemdum utanaðkomandi eftirlitsaðila.

Úrbætur og skráning.

Niðurstöður sannprófunarinnar skulu skráðar og undirritaðar af forsvarsmanni eldisstöðvarinnar.

Tímasett úrbótaáætlun skal gerð fyrir þau atriði sem metið var að þyrftu frekari úrbætur.

Andmæli First Water:

Fyrirtækið er með mjög ýtarlega innri úttektaráætlun á innri vef sínum. Innri úttektaráætlun fyrirtækisins inniheldur innri úttektir á öllum verkferlum fyrirtækisins þar sem hver og einn verkferill er mjög ýtarlega sannprófaður (sbr. Viðauki III í reglugerð). Innri úttektaraðili er alveg óháður þeim þáttum sem verið er að sannreyna (sbr. Viðauki III í reglugerð). Gátlisti er inni í hverri innri úttekt fyrir sig sem inniheldur öll atriði sem þarf að sannprófa (sbr. Viðauki III reglugerðar). Liðir a.-e. í viðauka III undir kaflanum Sannprófun, eru allt þættir sem eru kannaðir og sannprófaðir í innri úttektum fyrirtækisins. Úttektaraðilar óskuðu ekki eftir að sjá inn í neina innri úttekt fyrirtækisins og gefa sér frekar að innri úttektaráætlun úttektarþega sé ófullnægjandi. Úttektaraðilar Matvælastofnunar geta ekki gefið sér að atriði séu ófullnægjandi án þess að biðja um að sjá þau og yfirfara þau, enda hefði félagið að sjálfsögðu orðið við beiðni Matvælastofnunar um aðgang að innri úttektaráætlun félagsins.